



Arkivnr: 2018/15305-41

Saksbehandlar: Guro Kjellerød

Saksframlegg

Saksgang

Utval	Saknr.	Møtedato
Utval for opplæring og helse		05.02.2019
Fylkesutvalet		20.02.2019
Fylkestinget		06.03.2018

Nye namn på skular i Hordaland fylkeskommune 2019

Samandrag

Fylkestinget vedtok 07.03.17 nye retningslinjer for namnesetjing av dei vidaregåande skulane. Vedtaket seier at det i hovudsak er lokale stadnamn som er førande for namnesetjing, og at nye namn skal vedtakast i fylkestinget.

Hordaland fylkeskommune har fire skular som er omfatta av samanslåing i perioden 2019-2020. Desse skulane treng vedtak om nye namn i fylkestinget.

Åsane vidaregåande skole skal flytte inn i nytt skulebygg i august 2020, og Sotra vidaregåande skule skal inn i nytt skulebygg august 2027. Også desse skulane treng vedtak om nytt namn i fylkestinget.

Økonomi: Ingen effekt

Klima: Ingen effekt

Folkehelse: Ingen effekt

Regional planstrategi: Ingen effekt

Forslag til innstilling

1. Fylkestinget vedtek at den nye samanslåtte skulen Bømlo vidaregåande skule og Rubbestadnes vidaregåande skule vert kalla Bømlo vidaregåande skule.
2. Fylkestinget vedtek at Åsane vidaregåande skole vert kalla Åsane vidaregåande skule.
3. Fylkestinget vedtek at den nye samanslåtte skulen Laksevåg vidaregåande skule og Bergen maritime vidaregåande skole vert kalla Nygård vidaregåande skule.
4. Fylkestinget vedtek at saka om nytt namn på Sotra vidaregåande skule vert utsett til 2024.

Ingrid Kristine Holm Svendsen
kst. fylkesrådmann

Svein Leidulf Heggheim
fylkesdirektør opplæring

Saksframlegget er godkjent elektronisk og har derfor inga underskrift.

Fylkesrådmannen, 15.01.2019

Hordaland fylkeskommune har fire skular som er omfatta av samanslåing i perioden 2019-2020.

Laksevåg videregående skole og Bergen maritime videregående skole er vedteke samanslått og samlokalisert frå hausten 2020 i mellombels lokale. Ny skule skal stå klar i 2023.

Bømlo vidaregåande skule og Rubbestadnes vidaregåande skule er vedteke samanslått frå hausten 2020. Organiseringa av aktiviteten ved skulen kjem fram i pilotprosjektet vedteke i fylkestinget 2016.

To av skulane skal inn nye bygg, Åsane vidaregåande skole flytter inn i nytt bygg i sentrum av Åsane august 2020, og Sotra vidaregåande skule flytter inn i nytt bygg hausten 2027.

24.10.2018 kunngjorde Hordaland fylkeskommune fire nye skulenamn. Kunngjeringa vart publisert i Bergens tidene, Åsane tidene, Bømlo nytt og i lokalavisene Sunnhordland og Nordhordland. I tillegg vart det sendt e-post til dei involverte skulane.

Forslag til nye skulenamn var:

- Bømlo vidaregåande skule
- Åsane vidaregåande skule
- Laksevåg vidaregåande skule
- Øygarden vidaregåande skule

Fristen for høyringsinnspel vart sett til 14.12.2018. Det kom inn 39 høyringsinnspel. Høyringsinnspela er lagt ved saka elektronisk.

Bømlo vidaregåande skule

Det har kome inn eitt høyringsinnspel på namnet Bømlo vidaregåande skule. Innspelar ynskjer namnet Bømmeløy vidaregåande skule.

I 2016 vart det vedteke i fylkestinget at Rubbestadnes vidaregåande skule og Bømlo vidaregåande skule skulle slåast saman. Det vart også vedteke eit pilotprosjekt som skulle sjå på korleis ein kunne løyse verkstadaktivitet og undervisning i tett samspel med næringslivet. Pilotprosjektet er ikkje ferdig utarbeidd, ein har med andre ord ikkje kome fram til ein konklusjon på kvar og korleis ein skal løyse areala knytt til desse programfaga. Det er utdanningsprogramma Elektro og TIP som fell inn under pilotprosjektet. ST og HO skal halde fram med undervisning i dei lokala Bømlo vidaregåande skule har i dag. Skulen sin administrasjon vil også halde til i desse lokala. Difor innstiller fylkesrådmannen på at det nye namnet på den samanslåtte skulen vert Bømlo vidaregåande skule.

Åsane vidaregåande skole

Åsane vidaregåande skole har hatt aktiviteten sin i leigde lokale i fleire tiår. Skulen sine lokale har også vore spreidd på opptil 10 ulike plassar.

August 2020 flytter skulen inn i nytt bygg midt i Åsane sentrum. Skulen vert samlokalisert med Åsane kulturhus og Åsane Tannklinikk. Det vert naturleg at den nye skulen i Åsane bydel tek namnet Åsane vidaregåande skule.

Det kom inn eit forslag om å kalle denne skulen for Tanks vidaregåande skole. Rutinane for namnesetjing av vidaregåande skular i Hordaland seier at ein skal bruke stadnamn i skulenamna. Vedtaket opnar likevel for ein kan nytte personnamn som denne innspelaren foreslår.

Åsane bydel har to vidaregåande skular. Den andre skulen heiter Tertnes vidaregåande skule.

Fylkesrådmannen meiner at den allereie eksisterande skulen Åsane vidaregåande skole bør halde på namnet sitt slik at ein har ein skule i bydelen med Åsane i namnet, og at målforma må endrast til nynorsk.

Laksevåg vidaregåande skole og Bergen maritime vidaregåande skole

Nytt skulesenter i Laksevåg bydel er planlagt å stå ferdig august 2023. Skulesenteret skal vere ein ny vidaregåande skule og nye lokale til Fagskulen i Hordaland. Nytt skulenamn omhandlar ikkje Fagskulen i Hordaland; det er namnet på den nye vidaregåande skulen på Laksevåg som skal vedtakast i denne omgang.

Før den tid skal dei to vidaregåande skulane Laksevåg vidaregåande skole og Bergen Maritime vidaregåande skole slåast saman. Dette skjer hausten 2020 då dei to skulane flytter inn i mellombels lokale der Bergen maritime vidaregåande skole held til i dag. Diverre er det ikkje plass til all aktiviteten skulen har, og utdanningsprogrammet Bygg og anlegg skal leige lokale i strekket mellom Laksevåg og sentrum. Det er per i dag ikkje avklart kvar desse lokala skal vere, men eigedomsavdelinga arbeider med saka. I løpet av sumaren eller hausten 2019 vil dette bli avklart.

Høyringsinnspel som har komme inn til namnevalet Laksevåg vgs, er mest opptatt av at ein ikkje ynskjer nynorsk målform i skulenamn i Bergen kommune. Fylkesrådmannen viser til vedteken målform for Hordaland fylkeskommune. Nynorsk er også vedteken målform for Vestland fylkeskommune.

Dei to skulane har kvar for seg sendt inn forslag til nytt namn på skulen.

Laksevåg vidaregåande skole har sendt inn to forslag, det eine forslaget er å halde på Laksevåg vidaregåande skule, og det andre forslaget dei ynskjer å fremje, er Lyderhorn vidaregåande skule. Dei grunnjev innspelet slik: «Namnet Laksevåg vidaregåande skule har ei klar geografisk tilknytning til området der skulen skal ligge. Namnet Laksevåg har og ein lang skulehistorikk, både frå Laksevåg yrkesskule som vart oppretta like etter krigen, og Laksevåg gymnas. Laksevåg som stadnamn er kjent utover området, også som tidlegare kommunenamn, og har og ei lang og rik maritim historie». Skulen syner også til at dei er opptatt av eit namn som er samlande når to skular skal slåast saman, og difor er stadnamnet Lyderhorn eit namn dei ynskjer å nytte i skulenamnet Lyderhorn vidaregåande skule.

Bergen maritime vidaregåande skole nemner akkurat slik som Laksevåg vidaregåande at det beste ville vere om ein finn eit namn som er samlande for personalet når ein slår saman to skular. Dei synest det er uheldig å nytte det eine skulenamnet når to skular blir til ein skule. Dei seier i innspelet sitt: «Når to skoler skal slås sammen, mener vi imidlertid at det er viktig å markere at personalet blir en del av en ny felles skole der man starter med blanke ark. En ny organisasjonskultur skal bygges, og det er viktig at personalet fra begge skolene opplever at de er likestilte ved starten av denne prosessen. For å ivareta dette mener vi derfor at den nye skolen bør få et helt nytt navn».

Bergen maritime vidaregåande skole ynskjer å kalle den nye skulen for Shetlands-Larsen vidaregåande skule og grunnjev namnet med at dei ynskjer å heidre krigshelten Leif Andreas Larsen, kjend som Shetlands-Larsen. Dei meiner dette vil gje skulen ei maritim tilknytning.

Det siste innspelet til nytt namn på den nye skulen på Laksevåg er Nygård vidaregåande skule. Innspelar Jorunn Bakke Johannesen grunnjev namnet slik: «Hvis man fletter navnet Nygård inn i skolenavnet, vil det speile lokasjonen til den nye skolen jfr HFKs tradisjon på å gi sine skoler stedsnavn. Nygård på Laksevåg er for oss som bor der det korrekte stedsnavnet til den delen av Laksevåg som nåværende Laksevåg vidaregåande skole ligger på. Det er skiltet til Nygård fra alle innfartsveiene, og navnet er vel etablert, med Nygård kirke, Nygårdslie skole (barnetrinn) og Nygård senter.» Videre grunnjev ho namnet med lokasjonen til den mellombels plassen skulen skal ha før ny skule er på plass, slik: «Nedre Nygård er lokasjonen til dagens Bergen maritime vidaregåande skole, og skolen på Nedre Nygård er en benevnelse som jeg har hørt bli brukt ved flere anledninger. Et diplomatisk valg, som gir begge skolene en viss gammel tilhørighet og som speiler lokasjonen».

Fylkesrådmannen støttar det siste innspelet og fremjar forslag om å kalle den nye skulen for Nygård vidaregåande skule.

Sotra vidaregåande skule eller Øygarden vidaregåande skule?

Forslaget om å kalle den nye skulen på Sotra for Øygarden vidaregåande skule fikk 24 innspel der ein ynskjer å behalde dagens namn. Det var svært få innspel som støtta det nye forslaget.

Nesten alle innspelarene grunna støtta til namnet Sotra vidaregåande skule med at dei meinte at namnet Øygarden vidaregåande skule ikkje var stadnamnet på området skulen ligg på i dag og heller ikkje stadnamnet der den nye skulen skal lokaliserast i 2027. Dei peika også på at dei meinte at det nye kommunenamnet ikkje hadde støtte i befolkninga i den nye kommunen. Det siste argumentet er vanskeleg å etterprøve.

Fylkesrådmannen fremjar forslag om å utsetje namnesetjing av skulen til 2024 då programmering og planlegging av det nye skulebygget tek til.